

嘉慶廬州府志

廬州府志卷四

賜進士出身廬州府知府溫陵張祥雲主修

古迹志上

地志載古迹始於王象之今世作志皆沿此例而劉昭注郡國志已於郡縣下附見經史故實其來遠矣今採諸書爲古迹志先以國名故城次以第宅之屬同出一書必取最先之說其舊志所載雖流俗傳聞文不雅馴亦姑從俗存之或加按語云

府治合肥國邑

古慎城

魏書地形志南梁郡慎縣

太平寰宇記慎縣因古慎城爲名古慎城在縣西北四十一里乃楚白公之邑也按春秋哀公十六年吳人伐慎白公敗之卽此城

路史國名紀吳伐慎白公敗之今廬之屬縣西北四十一里有故慎城慎水

按水經潁水至慎縣東南入於淮注云故楚邑白公所居則在潁上縣非此慎也此慎乃宋齊以後僑立之縣寰宇記路史俱誤詳沿革志合肥縣

舒城國邑

舒國

春秋僖公三年夏四月徐人取舒杜注舒國今廬江舒縣

左傳文十二年羣舒叛楚夏子孔執舒子平及宗子遂圍巢杜注羣舒偃姓舒庸舒鳩之屬今廬江南有舒城舒城西南有龍舒又云平舒君名宗巢二國羣舒之屬正義曰世本舒姓舒庸舒廖舒鳩舒龍舒鮑舒龔以其非一故言屬以包之

太平寰宇記舒城縣古舒國地漢書云廬江六縣東卽古舒城

按杜注云舒國今廬江舒縣今考廬江舒城二縣皆舒縣地也

舒庸

春秋成公十七年冬十有二月楚人滅舒庸

太平寰宇記舒城縣舒庸城與舒鳩相似

路史國名紀今廬之舒城也一作羣舒舒子爵

通志姓氏略舒羣舒兩姓

舒鳩

春秋襄公二十有五年秋八月楚屈建帥師滅舒鳩

左傳定公二年夏四月丁酉吳子使舒鳩氏誘楚人杜注

舒鳩楚屬國

太平寰宇記舒鳩城在舒城縣城內

路史國名紀今廬之舒城也離城荒浦鳩茲皆其地

按鳩茲今蕪湖境

離城

左傳襄公二十五年秋七月舒鳩人卒叛楚令尹子木伐之及離城杜注離城舒鳩城

荒浦

左傳襄公二十四年秋舒鳩人叛楚楚子師於荒浦杜注荒浦舒鳩地

龍舒

太平寰宇記龍舒城在縣西一百里龍舒水西城內有池水深六七尺雖亢陽霖淫水無盈耗

路史國名紀作舒龍杜預云六縣西南有舒城又西南有龍舒今舒城西有龍舒故城

舒鮑

路史國名紀舒鮑引世本云小國又云晉悼公大夫舒鮑
無終

太平寰宇記舒鮑城在舒城西一百里龍舒水南小於諸
城

桐鄉

左傳定公二年夏四月辛酉桐叛楚杜注桐小國廬江舒
城西有桐鄉

後漢書郡國志舒有桐鄉劉昭注古桐國
路史國名紀桐鄉有三一在舒城

按後漢書舒縣注古桐國蓋謂舒縣包有古桐國地也今
桐城縣乃古桐國地恐桐鄉亦在桐城非舒城地也

廬江國邑

六城

春秋文公五年秋楚人滅六杜注六國今廬江六縣

太平寰宇記六城在舒城縣東南六十里

天下名勝志六城在舒城縣西南六十里淮南王黥布都此

路史國名記有阜陶冢在舒城東南六十里陂中

按後漢志廬江郡注建武十年省六安國以其縣屬其六安國注阜繇冢在縣晉因漢制故杜預云六國在廬江六縣卽今之六安州也至廬江縣六城則始於東漢元和二年改廬江郡爲六安國徙江陵王恭居此至和帝初復以

爲廬江郡章懷注今廬州廬江縣西故舒城是也名勝志
路史談

潛城

左傳昭公二十七年春吳公子燭庸帥師圍潛杜注楚邑
在廬江六縣西南

太平寰宇記古潛城在廬江縣南二里左傳昭公二十七
年吳子欲因楚喪伐之吳公子燭庸帥師圍潛注云潛楚
邑在廬江六縣西卽此城

方輿勝覽潛城在廬江縣南六里左傳云云同寰宇記

按杜注廬江郡六縣西南正今霍山縣地楚之潛邑漢之
潛縣俱在此若廬江潛城則魏書地形志廬江郡潛縣是

也其舊城所在今不可考

無爲國邑

駕釐虺

左傳成公十七年楚人圍巢伐駕釐虺杜注巢駕釐虺楚

四邑

顧棟高春秋大事表駕釐皆在無爲州境虺在廬江縣境

庸浦

春秋襄公十三年夏吳侵楚戰於庸浦杜注庸浦楚地

顧棟高春秋大事表庸浦今無爲州南濱江之浦也

滑汭

左傳宣公八年春楚爲衆舒叛故伐舒蓼滅之楚子疆之

及滑汭杜注滑水名

顧棟高春秋大事表滑汭當爲今廬州府境

巢縣國邑

巢國

水經注居巢縣古巢國也湯伐桀桀奔南巢卽巢澤也尙書周有巢伯來朝春秋文公十二年夏楚人圍巢巢羣舒國也舒叛故圍之永平元年漢明帝更封蕃邱侯劉般爲侯國也

路史國名紀巢南巢氏桀之封秦爲居巢

原注亦作鄴項羽傳范增居鄴

人今無爲之屬鄆縣也古巢伯國

原注亦書爲子入楚爲巢公

吳滅之

昭公二十四年

顧棟高春秋大事表巢縣東北五里有故巢城爲春秋時楚之巢邑

橐臯

春秋哀公十二年夏五月公會吳于橐臯杜注橐臯在淮南浚道縣東南

漢書地理志橐臯注孟康曰音拓姑

元豐九域志巢縣有拓臯鎮

方輿勝覽拓臯在巢卽春秋哀公十二年會吳于橐臯是也紹興十一年兀朮入寇劉錡敗之於拓臯橐臯城其地有孔子臺相傳孔子南遊至橐臯與弟子憩臺而返臺狀圓壇可容千人近臺有聽書港云是當時弟子事其水爲

橐臯河

顧棟高春秋大事表巢縣西北六十里有柘臯鎮俗名會
吳城爲吳橐臯地

府治合肥故城

漢合肥故城

太平寰宇記合肥故城漢爲縣故城在今縣北梁又改爲
汝陰縣北齊分置北陳郡皆在此邑城也

天下名勝志合肥故城卽所謂金斗門也在縣治東遺址
尙存

明隆慶志金斗門在縣治東北乃古合肥城遺址尙存

漢遼道故城

太平寰宇記遼遒故城在慎縣南二十五里魏武伐吳修此城以屯守呼曰曹城

輿地紀勝在梁縣南三十里

康熙志地名清水橋

按遼道蓋得今合肥東巢縣西北地其故城當在合肥東界與巢縣相接

白公城

天下名勝志合肥有白公城左傳哀公十六年吳人伐慎白公敗之於此有白公城及池存

按合肥之慎乃南朝僑置之縣左傳吳人伐慎白公敗之在今潁上縣與合肥無與不得有白公城也

古滁陽城

太平寰宇記古滁陽城在慎城東北六十四里吳赤烏十三年孫權遣兵斷滁作堰以淹北道遂築此城爲守備

按晉地理志江西江以北廬江九江之地自合肥以北至

壽春悉屬魏其時舒居巢襄安諸縣江津要害之地雖爲吳所據豈能於魏境築城當是魏人所築以備吳耳吳志赤烏十三年無築滁陽城事

南梁郡

太平寰宇記東晉置南梁郡開皇三年廢

輿地紀勝在梁縣東北四十里

梁王城

輿地紀勝梁王城在梁縣東六十里

魯王城

輿地紀勝魯王城在梁縣東七十里

魏新城

太平寰宇記青龍元年滿寵爲揚州都督上表請於合肥西北三十里立新城故吳志云大帝頻征合肥新城是也晉爲淮南廬江二郡地東晉亦爲重鎮

天下名勝志在合肥西北三十里新城鄉

康熙志新城在城西三十里雞鳴山北

劉馥立州治

輿地紀勝獻帝時曹操表劉馥爲揚州刺史單馬造合肥

空城立州治今合肥縣西二里故城是也

晉慎縣故城

太平寰宇記古慎城在縣西北四十一里

見上

天下名勝志東晉有慎縣分遼道置也廣記云東魏於慎縣置平梁郡陳去平字隋時郡廢紹興三十二年避諱改慎爲梁明省梁入合肥爲梁縣鄉轄十一里宏治初店埠民修橋掘得小石碣可長三尺上鐫慎縣界三字背刻少避長賤避貴六字

古梁縣城

輿地紀勝古梁縣城在梁縣治東八里卽古平梁郡

唐張祜詩平湖阻城南長淮帶城西北哉金斗勢曹瞞梁合肥

金牛城

太平寰宇記界樓故城一名金牛城在合肥縣西北五十里開皇五年立鎮置倉在廬壽二州界

輿地紀勝金牛城在合肥縣西隋開皇五年置或云漢永平十一年巢湖出黃金太守獻之或取此義

小峴城

梁書韋叡傳遣梁郡太守馮道根攻魏小峴城中宿而城拔遂進討合肥

陳書黃法氾傳齊遣歷陽王步騎五萬來援於小峴築城
江南通志在合肥縣東七十里

潁城

江南通志在合肥縣西北唐光啟二年壽州刺史張翺遣兵寇盧州楊行密將田頵等敗之於潁城是也

斗梁城

輿地紀勝斗梁城宋乾道五年郭振築新城號斗梁橫截舊城之半而阻絕舊城於斗梁城之外

天下名勝志合肥縣宋乾道五年郭振築斗梁城跨金斗河北振卽郭少保字仲峯涇源人

清水鎮

輿地紀勝清水鎮在梁縣北六十里自鎮至州九十里開禧用兵濠州寄治於此統制周用實兼知州事

元朮上城

康熙志在合肥縣北五里紹興辛巳年金人南侵陷廬時

築

護城

明王守仁過護城詩古道當長坂肩輿入暮天蒼茫聞
驛鼓冷落見炊煙凍燭寒無餘泥鐵涇未然正思江檻
外聞卻釣魚艖

竹林關

明崇禎志在城西五十里石佛山兩旁皆石中有路通人
行元末設關守隘今廢

舒城故城

高陽城

天下名勝志高陽城在舒城縣西南二十里相傳高陽氏

封其子於夢舒之間卽臯陶庭堅也

按夢舒江南通志作舒蓼

鵲岸

左傳昭公五年冬十月楚子以諸侯及東夷伐吳吳人敗諸鵲岸杜注廬江舒縣有鵲尾渚

輿地紀勝鵲岸在舒城縣西北

西京記鵲岸今居巢江南水有鵲尾渚者是也

按鵲尾渚屢見南北史要屬濱江之地當在無爲境內輿地紀勝以爲在今舒城縣未確

羹頡城

輿地紀勝膾臙堰在舒城縣卽漢羹頡侯所築有羹頡侯

廟劉邠爲之記甚詳謂之漢舒王廟

天下名勝志羹頡侯城在縣西北三十里有墓在焉

江南通志漢高帝七年封兄子信爲羹頡侯食邑於舒

亞夫城

康熙志舒城縣亞夫城俗傳爲周亞夫築或亞父范增未
可定

一統志在縣東南十五里相傳周亞夫嘗領兵至此有東
西二城基尙存

周瑜城

輿地紀勝周瑜城在舒城縣西十八里

天下名勝志花家城在舒城縣西七里謂之竹市又十里

爲周瑜城引縣志云今爲淨梵寺種菽者往往得箭鏃金
鏡之器或云卽牧馬市處

明隆慶志去縣西十八里吳周瑜從孫權舉義兵討董卓
徙家於舒因築此城

明胡守恆登周瑜城隍古詩登城見古寺憑弔幾英雄
兩漢餘工業三分定霸功
戰士壘花歷美人宮欲
問當年事長天沒去鴻
明倪域詩土牆傾壞短樓平云是周卽此築城不見人
提三尺劍空聞屯聚八千兵雨餘草色迷狐跡月落山
風響柝聲幾度登臨倍惆悵豪華今古最關情

花家城

輿地紀勝花家城在舒城縣西七里謂之竹子節

桃城鎮

輿地紀勝桃城鎮在舒城縣北二十五里

九井鎮

輿地紀勝九井鎮在舒城縣北二十五里

版城

輿地紀勝版城在舒城縣東二十里

鐵城

輿地紀勝鐵城在舒城縣西十八里

茆城

天下名勝志茆城在舒城縣東南相傳魏帝築城時以茆掩之詐疑敵兵故曰茆城

明隆慶志去舒城縣東南二十里世傳曹操屯兵於此築之

羊舌城

天下名勝志羊舌城在舒城縣北十里

明隆慶志在舒城縣西十五里

江南通志羊舌城一名陽石

元朱子範宿羊舌城詩舒蓼皆侯國春秋用甲兵晚炊
投野店日落弔荒城古渡漁燈滅陰房鬼火明愁來不
成寐歎枕待雞鳴

繆家城

江南通志在舒城縣西十五里

霍湖城

明隆慶志去舒城縣一十里土人築以避兵

按江南通志在舒城南五里

圍箕城

明隆慶志在舒城縣西十里

江南通志花家城圍箕城羊舌城繆家城俱南北朝及南宋初戍守之所

北峽關

方輿勝覽北峽關在舒城南四十五里官兵守把爲入蘄黃之要地

輿地紀勝北峽關在舒城縣南四十五里關南屬安慶府關門樓堞悉備

龍眠山寨 石山寨

輿地紀勝竝在舒城山險有水可容數千人

廬江故城

漢龍舒故城

太平寰宇記廬江縣本漢龍舒縣地故城在今縣西一百二十里

按漢龍舒故城當在今舒城桐城境內不當在廬江

漢舒縣故城

括地志舒今廬江之故舒城是也

太平寰宇記廬江六縣東卽古舒城後漢立郡徙理皖城唐開元二十三年刺史竹承構奏於故城置舒城縣

按漢舒縣得今廬江舒城地隋改舒縣曰廬江唐又分合肥廬江置舒城縣其舒縣故城或在舒城或在廬江未可

汝知輿地紀勝引元和郡縣志本舒國後漢立郡云云與寰宇記略同

大城

天下名勝志大城在廬江縣西南三十里曹氏拒吳所築按廬江縣西南大城或謂卽故舒縣址三國時廬江巢縣及無爲州皆爲吳所據魏不應得於此築城也

慕容城

天下名勝志慕容城在廬江縣東二十里世傳慕容垂屯兵於此

金子砦

康熙志廬江金子砦一曰天子砦在馬槽山山勢險峻曹

操屯此又劉郎砦一日牛欄據馬槽絕頂自麓至走馬嶺
上凡十數里砦址寬平可容萬眾而下堰古埂之水通糧
運險要可守處也世傳天色陰晦隱隱聞金戈鐵馬之聲
金華砦

冷水關
康熙志在廬江黃屯山上勢亦險要世傳金華女名無考

天下名勝志冷水關在廬江縣西三十里夾道如關相傳
三國時魏氏設隘之所

康熙志在縣西一十五里曹魏設隘於此石門尚存
按明地理志有冷水關巡檢司乾隆年間裁

明潘濫詩石磴立嶽巖關門在層巔客行煙霄際滿耳
聞風泉月痕鎖長在賺影殊未想到想當用武時計此千

萬年

無爲州故城

漢臨湖故城

天下名勝志漢臨湖縣在無爲州東南六十里濡須潛水之交

明隆慶志臨湖廢縣今爲臨湖圩在州南八十里臨壁山下

漢陰陵縣城

一統志漢陰陵縣故址在今無爲州北黃雒河東北卽田父給項羽失道處

按胡三省通鑑注引括地志陰陵故城在濠州定遠縣西

北六十里則不在無爲州境

漢襄安故城

元豐九域志注無爲縣有襄安鎮

天下名勝志無爲州襄安廢縣今屬襄安鄉有渡

江南通志襄安舊縣在州南四十里襄安鄉西對臨湖東
下繁昌漢置

九江郡治

康熙志在無爲州襄安鎮秦漢以前江通城下爲舟車要
路

按地理志漢九江郡治壽春不應在無爲州境

新附城

天下名勝志新附城在無爲州南十五里吳諸葛恪築安
集流亡其處有諸葛公廟卽祀恪者

魏無爲廢城

太平寰宇記無爲軍本廬州巢縣之無爲鎮曹操征孫權
築城於此攻吳無功因號無爲城臨濡須水上

康熙志無爲縣治在花家疇

州志無爲縣本唐巢縣之城口鎮故址今在州西三里花
家疇

安樂柵

江南通志安樂柵在無爲州東北梁太清末合州刺史郗
陽王範屯於濡須遣世子嗣將兵守安樂柵明年嗣破侯

景將任約於三章遂徙鎮焉亦謂之安樂柵胡氏曰三章
在濡須之東

扶陽廢縣

江南通志在無爲州西北接巢縣界晉太元中僑置
開城廢縣

江南通志在無爲州西四十里唐武德三年置屬巢州七
年廢今爲開城鎮

李鵲城

按水經注白石山水發白石山西逕李鵲城南西流注柵
水故城當在無爲境內

黃金城

州志古黃金城在州治北十五里今季家岡皆其遺址
糝潭鎮

元豐九域志注無爲有糝潭鎮

州志在州南七十里濱江唐文德初楊行密議襲趙瑄於
宣州自廬州帥兵濟自糝潭是也

巢縣故城

桀王城

天下名勝志巢縣引輿地志云臥牛山背有桀王城

江南通志今爲紫薇觀

居巢故城

一統志在巢縣東北五里

康熙志今臺址猶存高丈餘邑人張氏據以爲冢下有聽書港洗硯池回車街兩山夾峙中通一綫相傳孔子回車處

晉南譙僑郡城

水經注柵口水導巢湖東經烏上城北又東逕南譙僑郡城南又東絕塘逕農山北

方輿勝覽郡志晉咸康中置南譙郡卽今之南譙鄉在巢縣

按江南道志云故城巢縣東南二十里晉太元中僑置南譙郡治山桑縣据此則巢縣境內亦有僑置山桑縣矣
潁川廢郡

水經注柵水東南積而爲竇湖湖南卽塘也塘上有潁川
僑郡故城

一統志在巢縣東南南北朝宋僑置屬南豫州南齊初屬
豫州後省

黃沙城

天下名勝志引城家記云黃沙城在巢縣小隴山下俗名
龜頭城以山形如龜頭故名按在縣西南五十里俯瞰湖
濱

土城

康熙志在巢縣去金城寺三里周一里餘乃曹操所築屯
兵拒吳者開阜河爲左拒欲徑通白湖以環其外也

東關口

太平寰宇記東關山在巢縣東四十里按顧野王輿地志云巢湖西北至合肥界湖東南有石梁鑿山通水是名關口相傳云夏禹所鑿

宋阮美成東關詩筇杖芒鞋倚短篷半篙春水飽帆風
兩關三寺山無數藏在濛濛煙雨中
又細雨斜風入亂山溼雲堆裏見東關一筇來訪林間
寺杜宇數聲春又殘

東關三城

水經注寶湖水逕流二山刺史山之開出王武子城北城

在刺史山上湖又東逕石塘穴北爲中塘塘在西北水中水出格虎山北山上有虎山有郭僧坎城水北有趙祖悅城竝故東關城也昔諫葛恪帥師作東興堤以遏巢湖旁山

築城使將軍全端留略各以千人守之魏遣司馬昭督鎮東諸葛誕率眾攻東關三城將毀堤過諸軍作浮橋陳於隄上分兵攻城恪遣冠軍丁奉等登塘鼓譟奮擊朱異等以水軍攻浮梁魏征東胡遵軍士爭渡梁壞投水而死者數千塘卽東興堤城亦關城也

濡須塢

太平寰宇記偃月塢在巢縣東南二百八十里又云濡須水口初呂蒙守濡須聞曹操將來欲夾水築塢諸軍皆曰上岸擊賊洗足入舟何用塢爲蒙曰兵有利鈍邂逅之間步騎相蹙何暇及水遂築塢如偃月故以爲名

玉海引元和郡縣志建安十八年曹公至濡須與孫權相

拒月餘權乘輕舟從濡須口入偃月塢在巢縣東南二百八里濡須水口

輿地紀勝濡須塢卽巢縣東關昔吳諸葛恪破魏師於此按濡須塢今在無爲州城東北五十里與七寶山相對

大堤

太平寰宇記嘉平四年諸葛恪作大堤遏巢湖左右依山夾築兩城留千人使全端留略守之魏遣諸葛誕胡遵圍東關將壞其堤諸葛恪率衆四萬大破之遂走

地穴

郭儀恭廣志地穴在居巢入數十里道險懸渡乃過旣入得平地數百里其中人民無異

廬州府志卷五

賜進士出身廬州府知府溫陵張加雲主修

古迹志下

府治合肥第宅

同食館

輿地紀勝合肥有同食館唐韓愈爲平陽路君作記

天下名勝志南城之上有同食館

明隆慶志唐刺史路應求建陳鴻韓愈俱有記

唐陳鴻同食館記合肥郡城南門東上曰同食館梁柱朽盡軒戶敬頰斷析委階椽落棟折風雨雪霜賓不可宿太守陽平路君刺郡之明年冬十月歲向熟民且閒陶瓦於原伐木於山磨舊礎築新墉迺豐賓堂迺巖前軒怒桶蚪蚪眉楹牙牙中回洞深高檐騰掀階閒容揖鐵盤開容賓盤柱閒容樂工屏閒容將吏左右爲寢室

更衣之所朱戶素壁潔而不華東西廂復廊直榭又西
閣下閣作瓌舍廡屋宏大中敞作南門容旌旂駟馬
上作丁字亭亭北列朱檻面城墉其下澗溝開導通水
因古岸植竹樹爲風月宴遊地東南自會稽朱方宣城
揚州西達蔡汝陸行抵京師江淮牧守三臺郎吏出入
多遊郡道是館成大賓小賓皆有次舍開元中江淮閒
人走嶠函合肥壽春爲中路大厯末蔡人爲賊是道中
廢元和中蔡州平二京路復出於廬西江自白沙瓜步
至於大梁斗門堰埭鹽鐵稅緡諸侯權利駢指於河故
衣冠商旅率皆直蔡會洛道路不第賓至投館亦諸侯
之事路君以家行文學知於朋友以端方沈默官御史
府以詳明典故爲尚書郎以通知政術爲合肥郡太守
質平訖心風俗丕變民知敬道吏不敢欺先年郡米數
萬石輸揚州軸轡相繼出巢湖入大江歲爲風波沈溺
者半適於湖東北岸棗泉里作廬廩三十九間州東
邑人米輸於此由申港出新婦江至白沙人不勞水無
害復他邑館舍次於同食無私利人人皆樂成昔左邱
明傳經因事書事鴻因蔡州道及諸侯之稅因同舍館
及路君之政亦春秋之旨傳曰自廬以往振廩同食太
和三年太歲己酉正月壬午朔二十日辛丑記

康熙志在梓潼觀西亦稱伍相公臺今爲觀

教弩臺

方輿勝覽教弩臺在懷德坊明教寺舊經云昔魏武帝築臺教彊弩五百人以禦孫權擢船唐大厯間因得鐵佛高一丈八尺刺史裴絹奏請爲寺

輿地紀勝教弩臺在左廂明教寺卽魏武帝教弩臺舊注云魏武所築教強弩五百人禦孫權船

江南通志在府城東門內九獅橋北

康熙志向多松陰

唐吳資詩曹公教弩臺今爲比邱寺東門小河橋曾飛吳主騎

明遠臺

方輿勝覽明遠臺在梁縣城內西南隅四環皆水中有一洲故老相傳鮑明遠讀書於此

按輿地紀勝略同

江南通志在府東北七十里梁縣鄉

俊逸亭

輿地紀勝俊逸亭在梁縣西南隅

康熙志明遠臺朱張持正卽其地建俊逸亭

葵廳

輿地紀勝葵廳卽郡之小廳也舊名葵廳

康熙志朱郭少保振建三至堂在其西

懸魚堂

天下名勝志晉羊續爲廬江太守有饋生魚者意難卻之
乃曝乾懸于壁上他日饋復出所懸魚以示之愚而退後
因建懸魚堂在治內

景賢亭

天下名勝志府治景賢亭國朝宏治十二年建因於馬亮
故宅得晏殊等餞歸詩賦發于亭前其後刻包拯戒廉詩
按馬包皆合肥人俱爲廬州太守俗呼馬狀元包龍圖

宋包拯書郡齋壁上詩清心爲治本直道是身謀秀幹
終成棟棟精鋼不作鉤倉充鼠雀喜草盡兔狐愁史冊有
遺訓無胎來者羞

安邊堂

方輿勝覽安邊堂在州治

輿地紀勝在設廳之後

衣錦亭

方輿勝覽衣錦亭在州治天禧中馬忠肅公歸守鄉郡創

此亭因名

輿地紀勝衣錦亭在郡圃東有記天禧五年通判張君房

文也

采郭詳正詩衣錦平時樂藏舟舊日愁蜀山斜照盡歸興尚遲留

日益齋

輿地紀勝日益齋在雅歌堂後

春風亭

輿地紀勝春風亭在金斗門外

宋戴復古廬州帥李仲詩春風亭會飲得塵字詩玉關
人老鬢絲新千里長城在一身氣使黃金結豪傑子揮
白羽靜風塵山河四望亭中景桃李一樹人下春向日
滿城騎戰馬而今四野盡耕民

問柳亭

輿地紀勝問柳亭在春風亭之南

見山亭

輿地紀勝見山亭在春風亭之東

寒碧亭

輿地紀勝寒碧亭在春風亭之西

雲月亭

輿地紀勝雲月亭在澄慧寺下臨藏舟浦

中和堂

輿地紀勝中和堂在廳後

凝香堂

輿地紀勝凝香堂在中和堂後

雙瑞堂

輿地紀勝雙瑞堂在州治凝香堂之後

簡靜堂

輿地紀勝簡靜堂在合肥縣治

爛錦亭

輿地紀勝爛錦亭在郡圃

懷謝亭

輿地紀勝懷謝亭在郡圃

五鳳樓

輿地紀勝五鳳樓在城上昔天祐中張崇築城創樓鳳集其上因此紀端後人作五鳳樓賦

明隆慶志在東城上

風鶴亭

輿地紀勝風鶴樓在鎮西樓西

鎮西樓

輿地紀勝鎮西樓在郡治後斗梁城上

天下名勝志斗梁城上有鎮西樓樓西有風鶴亭亭有碑

韓元咎記文

記見形勝

鎮淮樓

天下名勝志 鎮淮樓在合肥縣治東郭少保改爲譙樓在
鎮橋南卽市橋也

江南通志 在府治明郡守龍誥重建有銅壺以核時刻

康熙四年郡守王業興乾隆十七年郡守趙瓊重修

明張瀚夏日鎮淮樓登眺和巡臺沂東劉公詩仲夏景
氣佳凭虛一延睇飛閣亘中天雨退紛無際蜀嶠西爲
壩南巢旋溶濤崇岡出斗躔淮漚浩東逝川原界吳楚
聲教雜荆衛峻琛何逶迤井邑烟火翳擊闕參四國帆
穀互飄繁沃土本宜稼雲時靡甯藝藟嶺南北雄控扼
天下勢緬茲教弩躡臺荒梵宮麗散兵亦有灣千秋槍
興替豸史勤省方青驄此淹憩解悃報遠風開心暢朝
齊誠如泰虎符適用渺塵世

明沈明臣詩魏相吳城幾劫灰高樓日暮且徘徊藏舟
浦斷寒潮落教弩臺荒野寺開六國天霜獨露草九江
秋色老宮槐淮南重鎮惟金斗白屋蕭條謹爲哀
劉綽綽

明顧璘鎮淮樓詩天半高樓誰構成畫閣朱棟倚虛明
江潮一片當窗瀉雲霧千重對酒生獨立淮甌雄舊國

下聽絃誦藹新聲
夜深燈火隨星散
不盡風流地主情
明黃道日鎮淮樓
晚眺詩臺臨河勢
曲樓散夕陽偏曉
望推空闌傷心屬
變遷雨消青野岸
風斷綠楊烟爲借
湖山迥長歌思悄然
郡守張祥雲詩襟帶江湖
古合州巍峩重鎮此高樓半
空星斗窗前落萬井炊烟檻外浮
清漏滴殘檐際雨疏
鐘聲散郡城秋
與永奠民安阜公暇登臨興正適

回龍橋

〔明崇禎志〕在德勝門內相傳曹操與孫權相持於此回節故云

草堂

〔輿地紀勝〕草堂在合肥縣治

櫻桃園

〔輿地紀勝〕櫻桃園在藏舟浦側

萬柳亭

輿地紀勝萬柳亭在西園

曲水亭

輿地紀勝曲水亭在澄慧寺之西

雅歌堂

輿地紀勝雅歌堂在道院北

綠野亭

輿地紀勝綠野亭在梁縣

雙杏堂

輿地紀勝雙杏堂在梁縣治

義門臺

明隆慶志在府城西十八里唐萬敬儒三世同居親亡廬墓大中年旌表其門後人因名臺今廢

按康熙志作義明臺誤

節婦臺

輿地紀勝節婦臺在合肥縣包孝肅公長子通判婦崔氏也通判卒生遺腹子尹京兆時又卒其母欲取以他適崔誓不復嫁泣告其姑曰婦旣歸寧母必強留當死于尺組之下願以屍還包氏其後果歸公家終老焉後朝廷乃賜封號及表其行

江南通志在府城內惠政橋東南

畫錦坊

輿地紀勝畫錦坊馬忠肅公亮守鄉郡得名

飛騎橋

方輿勝覽飛騎橋卽今西津橋大觀間立碑

輿地紀勝飛騎橋大觀中皇甫麟記云孫權爲張遼所襲躍駿馬得免故以是名則西津橋碑之言誤矣

天下名勝志飛騎橋在明教臺東一名逍遙橋其下爲道

遙津

宋李育飛騎橋詩魏人野戰如鷹揚吳人水戰如龍驤氣吞魏王惟吳王建放敢到新城易霸王身當萬夫敵麾下倉皇無羽翼途窮事變接短兵生死之間不容息馬奔津橋橋半撤洶洶有聲如地裂蛟怒橫飛秋水空鷗鷺徑度秋雲缺奮迅金鴻汗流脫濟主艱難天借力艱難如是報恩時平日主君須愛惜

鳳凰橋

天下名勝志鳳凰橋在合肥縣鎮淮樓西巷

西巖書堂

康熙志在合肥巢湖西岸朱安淮有記

馬忠肅公故宅

江南通志在府城和平橋東明改爲下察院

香花墩

康熙志在合肥縣南城外壕水中孝肅包公讀書處今爲
公祠蒲葦數重魚鳧上下長橋徑度竹樹陰翳舊有軒名
回瀾遊人至此作濠濮閒想

郡守張祥雲香花墩謁包孝肅公祠詩香花墩上拜祠
堂蒲葦瀟瀟水一方遺澤長綿臧氏後清風舊仰鄭公
鄉碑故古壁滋陰蘇艇繫迴瀾釣夕陽鏤板重新章奏
稿千秋俎豆共輝煌

許肇封謁包孝肅祠詩肅拜崇祠下惟公開世英臣非
邀福者人自比河清奏議畱今古鬚眉見性情池臺風
雨夕彷彿讀書聲

余忠宣公故宅

康熙志卽今合肥縣治洪武中恩桂坊尙存元統癸酉科
題額也

青陽山房

天下名勝志在合肥東南六十里近巢湖元都人余闕躬
耕養親卽田舍置經史釋耒卻讀至順癸丑及第以浙東
僉憲守安慶至正癸巳陳友諒攻破城力戰不敵自刎死
謚忠宣

元程文青陽山房記青陽山房在今廬州東南六十里
巢湖之上因山以爲名合肥余公讀書之處也余公未

第躬耕山中以養其親卽田舍置經史百家之書釋耒
則卻坐而讀之以求古聖賢之學是時未有青陽山房
之名也及出仕不忘其初乃闢其屋之隘陋而加葺焉
益儲書其中冀休官需次之暇以與里中子弟朋友講
學於此始有青陽山房之名然而未有記也文客京師
謁公於翰林辱不鄙而與之論學因及青陽山房之事
屬以記固辭不獲退而思之余公世家武威生長淮西
武威之俗以馳馬試劍爲雄淮西在宋時爲極邊其民
操干戈持弓矢習戰鬪賴國家承平偃武修文未百年
閒余公以儒自奮文章政事煥然爲人所宗而名聲遂
流聞於天下青陽山房以余公而得名不然一田舍爾
故地不自勝因人而勝人不自賢以學而賢甚矣人之
不可以不學也余公之有是山房也非以自私也欲與
學者讀書於此里之子弟被余公之教皆曰青陽山房
多書吾其游焉讀書而有成郡邑之人慕余公之義又
將曰青陽山房多書學之者眾吾其游焉讀書而有成
四方之士聞余公之風莫不曰青陽山房多書學之者
皆有成吾其游焉後來繼今聞風而興起者又若是將
見賢才濟濟出爲邦家之光青陽山房傳之不朽矣豈
不盛哉此記之所爲作也若夫湖山之勝深者涵雲天
高者薄霄漢蛟龍之所蟠虎豹之所蹲怒而爲風喜而
爲雨聲色動植之物陰晴明晦之變古人之所爭今人

之所賞遺墟與壤可喜可愕則又青陽山房之奇觀也
當有明公顯人妙能文辭者遊而賦之記不備錄余公
名闕字廷心至順癸丑進士及第初命泗州同知擢翰
林應舉遷刑部主事復入翰林爲修撰拜監察御史轉
禮部員外郎出爲湖廣行省郎中徵入集賢爲經歷尋
改翰林待制今爲浙東廉訪云至正十年七月記

花園

康熙志在府城南二十里元至正閒宣讓王游賞之處故
址尙存

環翠山房

康熙志在合肥湖右永樂港之源元葛徵君聞孫隱居講
學之所

思惠樓

康熙志在府城隍廟在水上明正德間知府徐鉅建登樓

環望烟火萬家卽思惠及於民故以名焉

明徐鉉思惠樓記廬州府城隍廟歲久傾圮父老募財
新之廟後舊有隙地基崇而平頗爲佳勝予因其羨餘
建樓其上廣數楹高倍之制古而材樸入窗洞達俯視
城堞工畢予與僚棠暇時登臨倚欄而立矚目而望徘徊
徧久之但見烟霏雲霧爲起出沒於檐阿之外南則鹿
起龍眠一帶之山隱然如峩冠長裾齊魯諸生拜伏於
前望乎東則青陽浮槎如屏障植立劍盾環擁望乎西
則雞鳴紫蓬如萬馬奔騰而來步驟躑躅或卻或前也
千古之秘一旦軒豁呈露若有以爲予樓而設者可喜
可駭萬有不齊予方應接不暇或曰子登斯樓也樂乎
可以琴可以奕可以招賓客而縱遊觀也予乃愀然曰
予非惟不知予之樂亦不知斯樓之所由作矣古之君
子在廊廟則憂乎民在江湖則憂乎君吾今與爾秩受
二千石握虎符以司一方之民社一夫不獲實予之辜
憂耶樂耶登樓一望遐思悠然見農夫之耕也箠手足
沾體膚則思稼穡之艱難見織女之蠶也取斧斤執鋸
篋則思村墟之空虛擔簦躡屩抱布貿絲見商賈之往
來也則思關市之征寒烟衰草敗壁頽垣見逃亡之未
集也則思懷綏之政喘而汗喙而息此勞者之弗息也
僮僕而曲躬呻吟而仰首此無告之顛連也凡此皆當

思思則情發乎中斯惠所由起也適以公署之第耳目
狹而聰明不達也假斯登眺以擴吾懷澡淪乎精神盪
滌乎塵垢藩籬旣撤壅蔽不生由是同仁之視觸機而
應于惠之政由推而得是樓之作固將有裨乎民非若
向風聞襟乘月清嘯徒爲逸樂之具而已子以爲樂不
亦左乎不聞南門中邱春秋書之以示戒并韓鹿譙詞
人賦之以爲諷乎吾惟思民之惠斯民樂吾之樂授照
之下民情一有未舒將引領與望惟恐吾樓之不登且
類也民樂吾亦樂憂樂亦係乎民於斯樓何與焉遂謝
或者扁其樓爲思惠作思惠樓記
明沈明臣思惠樓詩高樓四面俯晴郊古道荒城半白
茆秋色中原迥萬里天空落木見孤棹鄴都王粲應雷
賦西蜀揚雄自解嘲頭白異鄉何所事江淮日暮楚雲
交

威遠亭

康熙志在府西城上明末寇至時知縣熊文舉守城駐此

作亭今廢

明熊文舉威遠亭記威遠亭者記余乙亥春分守西
門之事也古人一觴一詠一遊一豫俱有記以彰不朽

而況戎馬生郊折衝禦侮之大故乎嗚呼當流氛逼豫
江淮要地其居常賈嬉嬉狃燕雀之安及寇在日前猶
然且信且疑余從郡伯吳公動色相戒者綦一年無有
起而效網繆者彼以爲無故而發難端牧民者實多事
知不可且奈何也鍾離焚劫勢岌岌乎殆哉維時予以
陽書生孤蹤四顧呼不率之眾而登陴令未教之民而
列陳環城遶關四十里蓋一日而周行者凡三匝且血
乾魂爽失也備十日而賊至攻五日而賊遁此十五日
之中白刃腥戰鼓統統其獲一疇而枕戈交睫者僅
三十五之晨賊被創擊烏鼠散去之片刻耳嗚呼忠義
在人心激昂斯奮靈長在宗社呼吸皆靈余輩所不凝
睚湯之血者鐘鼓實式臨之百千父老子弟擐甲負
羈勒以從之力耳余實憚人春夏以來兀兀千祗以慈
和集父老以謙讓謝上臺以左支右掣給軍需以無爭
有禮優士卒是骨皆銷無心不碎勦則未也我勞如何
且暮爲斗閒祀者幸天威之早振俾氛祲之全消山高
水清漠然復見太平之舊峴山墮淚二三子實從余烽
火鼓鼙開異時風景不殊慷慨憑闕當必有爲余喟然
而發歎者

別虞橋

天下名勝志別虞橋在合肥城東六十里相傳爲項王別
虞姬處俗名鱖魚橋

江南通志嗟虞墩在府東北八十里世傳項羽於此別虞
姬

藏舟浦

太平寰宇記合肥縣藏舟浦卽曹操與孫權藏艦於此唐
貞觀十年刺史杜公作斗門與肥水相接浦內有島嶼花
竹頗爲佳境

方輿勝覽在金斗門外廣十丈袤八十丈昔張滂所鑿藏
艦以拒吳

輿地紀勝劉貢父遊後浦新詠有從劉園至澄心寺卽此

浦也又金山灘在藏舟島李會詩云金沙灘上雙鴻鵠肯
爲分司御史來

箏笛浦

太平寰宇記箏笛浦續搜神記云浦中昔有大船覆水內
漁人宿笏聞箏笛之聲及香氣氤氳是曹操載妓船覆於
此

輿地紀勝在古城內后土廟側

李天龍箏笛浦詩漁唱朱樽歌胡來絲竹音循音事窮
探乃在滄法心悽悽婉以幽奇恐一何深曾聞魏諸姬
膠舟南浦陰豔質付清波水大雨雷霆不能變狹鶴蟲
沙紛浮沈我欲燃屏照愁見遺釵簪北望銅雀妓先後
同哀吟

二石牛

方輿勝覽土地堂前有二石牛父老相傳初濬治肥河得
之土中形製甚精對峙爲角抵觸狀復塑二牧童橫笛跨

其上

明隆慶志今不存

樂賜亭

明孟紀樂賜亭記天順五年夏六月不雨田疇逼兵苗
日就稿民心皇皇若將無以爲命予甚閔之迺於是月
廿有五日中午午率僚屬禱於城隍之神越明日乙未天
雨雨雨申又雨丁酉大雨如注遠邇沾足稿者復甦民
大悅歡聲載道皆曰神之賜也時予命工建拜亭適成
因名之曰樂賜志神賜也今有受人之賜者雖一飯之
微亦思有以報之乃者之早加以數日飢歛在目今茲
之雨轉凶歉而爲豐穰易愁歎而爲謳歌挈飢餒流徙
之民置之安飽之域神之賜如此其大亦將何以報之
於乎神豈責報於民哉夫以莫大之賜而不責其報是
妄民之樂之而不能已也雖然豈准民哉凡有志於民
者皆同其樂也春秋僖公得雨而喜蘇子於扶風以喜

兩名亭是皆有志於民者夫閔雨與民同其憂苦雨與民同其樂此君國子民之道顛予何足以知此然禮早而雩周公卿有田祿者祈甘雨以介黍稷禮神祈雨其來尚矣故予見一雨暘之爲虐必禱於神禱之未嘗不致其誠而神亦無不應傳所謂有其誠則有其神信不誣矣後之有志於民者苟能致其如在之誠則神之賜又豈有終窮乎故書以爲樂賜亭記復系以歌曰神之來兮靈雨沛神之去兮靈風翔蜀山高兮脰水長樂神賜之不能忘

繼樂亭

明林瀚繼樂亭記是亭也廬郡太守建於城南用爲祀神齋所方未旱而經營之比落成適甘雨霈然浹於四郊遂名曰繼樂蓋樂民之樂非樂己之樂也太守其賢乎哉予聞宏治己未歲西蜀馬君金汝弼始攝守是郡其年春夏積誠惻雨隨感輒應境內士大夫歌頌作焉舊同寅王郡判政嘗走書布部委請象宰秦公崇化大同成劉公道亭雨序以紀其速今甲子夏旱甚熾昔井澤涸而麥苗槁矣人心皇皇懇願興嗟闕知攸措汝弼憂結於心悴形於色乃蔬食齋居旦率羣寮吏士免冠行禱於城隍暨諸神之祠者殆匝月仍設壇

法漢儒董仲舒象龍蟠以禱復絲俸質市庶品分遣
屬職合肥縣知縣孫紘舒城主簿何雍教授孫佐教諭
張鴻詣諸名山大川明神宮洞祭告且孟龍潭水寅諸
壇中罄竭精誠如此未幾天乃大雨盡三五晝夜四境
沾足麥秋已登而稿苗勃然以興所謂天不遺斯民早
而賜之以雨者寧無所感然耶由是耄倪歌舞以占豐
年之慶今同寅崔二守嵩陳郡判冕許節推揚僉謂太
守德惠非載諸金石後將何傳乃緘書徵予記予憶汝
禱向者繕修羣工爲利於廬也甚博予嘗記其事矣斯
亭之紀又不可辭者何也蓋汝礪爲吾翰林舊寅契今
少宗伯紫崖公之子爲吾舊屬考功主事俞之兄况其
舉春閏時予爲同考及職秋官時又爲同朝奇其家學
之焚才器之充抱負之大蓋已有素殆非新知者比是
雖老邁不文亦不容不舉筆也昔先正曾南豐在闕禱
雨之文有口麥苗滿野得雨而成則民得繼其豐年之
樂亭以綴樂名者蓋取諸此夫汝礪始之憂旱者憂民
之憂今之名亭者樂民之樂蓋亦南豐愛民之誠蘇文
忠公喜雨名亭之意范文正公先憂後樂之心古今一
理曠百世而同符耳視彼徒事樓臺花石以樂己之樂
者用心何如耶又問天順中前守孟公玘嘗以甘雨應
禱爲神之賜名其亭曰樂賜蓋取蘇公所謂樂於此亭
者雨之賜也庶民逮今思之不忘夫樂賜者樂歸於天

繼樂者樂歸於人天人亦同一理感應亦同一心用見
孟馬同一賢守也汝礪起而大川指日可期安知後人
思馬不猶今之思孟扶風之思蘇不猶閩人之思南豐
也哉庸記於石以爲後之郡守告且以勸其同民憂之
心也

宜園

張純修宜園記廬州古合肥地星分金斗襟淮帶江從
古取天下者所必爭之區也卽使有名勝之跡臨亭臺
榭之美亦滅沒於荒烟蔓草之中欲求如僻壤小邑山
巖水滢之獲全也蓋什不得一矣康熙癸酉冬余來守
郡聞有宜園者在東來山下澗水九繞蜀山對峙結構
點染甲於廬陽欲往觀焉爲簿牘所羈未果甲戌之春
相國李公方廬居因策騎往謁時相國白衣冠攀枝執
條朝夕作孺子泣余亟請歸第不允乃遍行茲園相國
爲余言此先封翁手創兵火之後重新之以當墓山丙
舍者也徘徊憑眺見相國能成先人之志不勝歎美夏
月再往時月臺後新軒落成適有白燕雙翔信宿而去
因名曰白燕廬遠近皆相傳爲篤孝所感秋月又往至
是請歸第者三矣俱不允畱園中竟日季冬之月士庶
連教告余日相公廬墓已二年寢處冰雪孝則孝矣如

廬州府志卷五

古述下

古

若生何余率以進言於相公既善其身卽推此孝思兼善天下可乎相國唯唯余退語諸僚屬暨郡邑之耆民秀士日相公至性不可移且母爲此喋喋昔歐陽文忠爲大丞相魏國公作豐錦堂記謂非一家一郡之榮而喜爲天下告也今相國身佐太平俾桑梓共享恬嬉茲園亦永保其勝且宏錫類之義以厚民俗守土者竊甚幸焉余雖遠遜文忠有不樂爲此邦鋪張而揚扞者歟因寫空園圖并書其顛末云

舒城第宅

舒王墩

康熙志在舒城北四十里俗稱羨韻侯爲舒王此其遺迹

文翁里

輿地紀勝文翁莊在舒城西南文翁廬江舒人守蜀郡興

文學

康熙志在舒城縣南九十里相傳爲翁故居

梅子真隱處

江南通志梅子真隱處在舒城縣西七十里梅山漢梅福棄官隱此

摩旗墩

康熙志在舒城縣南十五里傳爲漢壽亭侯駐兵之處

小赤壁

明崇禎志小赤壁在泊南周瑜城南石壁臨河赤色燦然

明劉武詩折戟鳴沈沙江風吹月白好載木蘭橈雪堂從二客

釣魚臺

康熙志在舒城縣東南八里石磯枕河爲左真人垂釣處

見

江盧

明魏元卿左慈釣磯詩輕舟涼月詠滄浪碧樹危磯向夕陽爲問仙人左元放藥鎚丹竈可曾荒

鳳皇臺

輿地紀勝鳳皇臺在舒城縣春秋山

仙人跡

輿地紀勝仙人跡在舒城縣春秋山之嶺有巨人足跡印其上

歸來宅

天下名勝志歸來宅乃李公麟歸隱之所遺址傍城羣山四合古柏森然在縣治東城上上有清心亭下有放生池池卽龍眠書院也元人揭傒斯曰李伯時龍眠莊故基在東禪寺東舒王祠西歲久湮沒于寺天歷中舒城令變理

公復之以建書院合祀公及蘇文忠黃文節二公蓋嘗過
從此地者以其面龍眠山仍名龍眠書院云

讀書堂洗硯池

輿地紀勝洗硯池在舒城縣之春秋山李公麟讀書堂在
其右公麟嘗滌硯池中因以爲名

明顧琛洗墨池詩一泓碧水涵寒漪云是公麟洗墨池
祇與居人共筆硯肯爲行客鑑鬢眉遼東鶴去歸華表
池底龍眠護葛陂雷得遺基鄰古寺老僧指點索題詩

龍眠書院

康熙志與金雞明德二院並載學校

清心亭

元無名氏清心亭記縣治東城之上古有飛霞亭宋賢
龍眠居士李公伯時隱居之所蘇文忠公嘗題詠其上

羣山四合松栢鬱然實佳境也因扁今名亭下有池曰放生中有亭曰清心宋末兵燹池湮亭廢者百餘年矣至元庚辰令尹趙侯以斯亭歷年已久風雨圯毀秦定甲子大梁張君士舉適至主簿事得放生池殘碑於草莽中昇置亭上剔薛讀之載亭頗詳乃葺而新之而池亭未暇葺以歲丙寅冀寧張侯來尹茲土公餘登覽斷碑訪龍眠舊隱求其池亭所在則荒池亭基延袤已爲邑人所有者三之二侯召而諭之尋亦還官乃取斷碑補其闕文刻置飛霞亭上俾來者有所考焉其高風雅致亦可嘉尙也已想其當時田園館宇之盛詩書圖史之高既有以自適其適而有邦人士暨諸遊宦於斯者時來考德而問業何其盛耶顧今田園亭池鞠爲茂草使牧童樵子笑歌躑躅於其上寧非政之闕與謀復舊規未暇及之至元己卯歲稔時和與監縣人不花公子安謀度興復蕪蒿萊剪荆棘浚深池環池築堤以備潢源比於舊制加倍浮梁壘徑以達通衢乃凡工伐木葺石陶甃構亭其上遂復清心之舊是役也無擾于民不尙華采不築牆垣以竹柳爲屏障飛甍重檐虛窗橫檻招邀爽氣一碧如鏡諸君於簿書期會之暇公事倥傯之餘招賢士大夫時一登臨談古今講道德訪求所以蘇民瘼去吏弊敷善化仰觀羣山之環時煩悅木竹之繁紆深雪其胸臆滌蕩其念慮一毫物欲不以自累其

名斯亭也蓋取包孝肅公清心爲治本之說豈徒樂其樂哉落成之日邑之諸父老請予文記之辭不獲故具本末俾刻之石以告後之鳴琴者嗣而葺之庶斯亭之不墮廢也

飛霞亭

輿地紀勝飛霞亭在舒城乃李公麟隱居之所蘇公軾曾爲賦詩相傳軾爲揭名今在尉廳閒禱依擬亭觀皆廢獨此亭在焉

康熙志下有放生池其旁爲清心亭

宋蘇軾題云樂天早退今安有摩詰長閒古亦無五畝自栽池上竹十年空看剡川圖近聞陶令閒三逕應許揚雄借一區晚歲與君同活計如雲鵝鴨散平湖

璇淵館

輿地紀勝璇淵館在舒城縣元符閒李公麟作記

按康熙志作璇源館

春暉堂

康熙志在舒城縣

明宋廉春暉堂辭舒城胡君拱辰幼喪父而母夫人教以儒家言積之既久遂能通其說發為辭章五色爛如也上官才之辟為大府掾未幾淮西兵起乃負夫人逃之江南雖艱難險阻莫不備嘗夫人安焉不異舒城時蓋胡君能孝有以忘其勞也士大夫咸慕之胡君曰是尚足謂之孝乎孟郊有云寸草之心豈能報三春之暉乎此吾志之不能自己者也遂以春暉名堂金華宋濂聞而善之為製辭一章夫人歲時坐堂上胡君奉饌上壽而歌余辭焉庶使聞之者知孝思之無已乎其辭曰謂母如山兮山則有極謂母如海兮海亦可測母如白日兮行乎青天無物不春兮穀之收京叶縱捐爾躬兮欲報母慈厚頂放踵兮亦親之遺終身之慕兮固曰能孝此惟其常兮匪異之道匪異之道兮何以報之天上地下兮茫無津涯有烏畢逋兮翩跹西飛載瞻載依兮悠悠我思

明劉基春暉堂詩母心如春暉兒心如小草鴻恩何以

報之死矢相保元雲結秋陰野曠霜露早喧寒旦夕異
搖落紛如掃歲月去悠悠行路漫浩浩惆悵與願違
翅翎皓長吁向穹蒼欲怨不敢道

古金雞墩

江南通志金雞墩在舒城縣西一里

康熙志其下爲金雞潭明秦莊簡公民悅會構書院於此
主簿原

康熙志詳見山川

廬江第宅

避暑臺

天下名勝志避暑臺魏武伐吳避暑休兵之處

康熙志在廬江縣舊傳魏武行軍常避暑於臺之東北今

城隍廟基

明錢念修詩久欲吞吳志未灰勞師冒暑築涼臺回看
嶺斷楓殘處孰識當年歌舞來

吳王宮

天下名勝志吳王宮在城東南紫芝坊內五代時楊行密
之故宅後廢爲光化寺寺有金剛院院碑賈易之文也今
名金剛寺

毛義隱處

江南通志在廬江縣東北七十里毛公山有讀書洞

縣志今毛公山洞廣九尺深三丈爲毛公讀書處石窗石
榻猶存洞前崖白牡丹相傳公父母冬日思得此花公望
天哀籲少頃遍山皆花

捧檄橋

康熙志未詳其地臨仙橋改建時掘地得碑書此三字按今在盧江城東門外半里跨河水爲橋旁有大碑題曰捧檄橋

南臺觀

明崇禎志在南關外水簾洞南左慈故隱處今廢爲倉及山川壇惟洞井無恙

釣魚臺

天下名勝志引王象之云左慈垂釣處有石磯磯有仙人跡

江南通志在盧江縣南八里

按今縣東南八里背山臨河有兩石磯相距里許相傳爲

左元放釣魚處

明潘謐詩巨石幾千古乃在潛溪曲奔壑橫枕流勢若
鯨額矣沙帶秋月明波連遠山綠一自嚴光去漁竿老
修竹

擲盃閣

天下名勝志魏志左慈在武帝坐以銅盤貯水持竹竿釣
水中得四鰓鱸帝命作鱠方須蜀薑慈請市之帝難之曰
到蜀可報前使買錦者增二十段曰諾後買錦使回里以
市薑日見慈始信爲然他日帝設鳩酒飲慈慈抽簪薑林
酒爲之斷飲其半訖擲杯中飛動如鳥翮皆仰瞻遂失
慈所在今縣有擲盃橋本此

〔康熙志〕在南門外大觀書院內有左慈像今廢

洗心亭

〔太平寰宇記〕隋將麥鐵杖爲陳擒于此亭側

仙隱亭

〔天下名勝志〕玉虛觀有水簾洞洞口有石傳聞元放嘗叱石守之又有仙隱亭亭前有竹軒叢竹皆下曲宋崇寧間邑宰張述來遊見而異之主者對曰昔左真人仙去棄竹杖于此而竹生焉

〔康熙志〕在水簾洞上宋隆興二年知縣劉銑構以表左仙之迹亭久廢明成化七年曾見有石刻沉水中

崇明館

康熙志在舊縣治南數十步宋知縣謝惟士併省以拓縣治後爲儒學

歐冶子鑄劍處

江南通志在縣東北二十里冶父山今爲寺

半山亭

康熙志在廬江黃銅山

明吳寬半山亭賦古縣西北有山巍然其名黃銅土人所傳卽厚地而盤據豈區區之一拳上獨峰之秀拔倚霄漢而逗雲烟勢孤而無所附境異而孰可專有一隱翁爰宅其下以山爲娛與山無忤振衣而長風生躡履而亂石度登和所旋徙倚區附如孫登之嘯蘇門惟李白之夢仙姥忽焉而迷莫識其所深墮乎谷高蔽於塢流或沂乎仙源響惟循乎樵斧縱獨遊而至此奚能記其步武於是手接飛鳥力當奔熊乃得盤石千人可容於焉憩息釋我短筇仰而視之上若崩牒架壑者何有高維松維石可礎維松可棟我亭修成陶匠何用隱然

如環矯然如鳳排闥青青兩山自送詠荆公之佳句豈
牛山之我共也乃扼其秀有泉旋焉堰而蓄之可以概
田乃瞰其下有溪洑焉沿而行之可以游船凡山之盛
益以肆陳於後先矣於是子弟列侍設几張筵不謀而
同更相進言由此而上以至於巔可以見百里之地可
以見四面之山遠而魏武駐兵之處八審三峰翠色相
連近而公麟龍眠之莊巖洞窈冥真可陋乎平泉而况
黃陂汪汪巢湖漣漣漁舟之所出沒界曠野而吞長天
皆在目曉之內不出跬步之閒何不據其上而得其全
乎翁聞而歎曰言亦何怪吾惟至此而力已憊謝康樂
之遊南山伐木通道而人爲之驚韓昌黎之下華山懸
梯接壁而事幾敗蓋履險者其足必危望遠者其神亦
邁故意在乎山水之外雖一邱一壑樂之終身而有餘
意在乎山水之內雖東循碣石西臨咸池而猶以爲隘
也皆應曰然稽首再拜老聃著止足之美孟子懲流連
之害翁之教我語意已解散請書之以爲樂山者之戒

魯班斗拱

康熙志在冶父寺山門相傳魯班神造鳥雀一觸卽返今

亡

無爲州第宅

仰高堂

方輿勝覽仰高堂在郡治米元章建并記後張孝祥題扁
寶晉齋

方輿勝覽寶晉齋米元章建中藏晉人法帖

明隆慶志在州治東有法書碑刻

按州治米公祠乾隆三十七年知州張僑摹刻陳洪綬拜
石圖於祠中

羣山觀

方輿勝覽羣山觀在漕廳之東遙指江南繁昌鍾阜諸山
州志宋寶元中運使張士元改爲祠奉灌口李冰之神明

洪武元年易名崇德觀今在小東門內

至游堂

天下名勝志至游堂在無爲州治內嘉祐中建

宋楊傑諫人孰不好游外物常未備佳勝容山海紛拏樂朝市不知務內觀未得游之至達士靡剛曠天道已昭熾六合極周流萬化覽要會

雲錦堂

天下名勝志無爲州治內有至游雲錦仰高三堂

桐軒

天下名勝志桐軒在無爲治

采滿維瑞詩軒外梧桐碧雨行跳空闌檻枕西堂風條弄月搖窗幌露葉驚秋墜井牀靜想還思理琴瑟高吟惟恐引鸞鳳誰憐不種朝陽地但愛清陰作晚涼

竹軒

一經堂

三思堂

天下名勝志竹軒在無爲州漕廳一經堂三思堂在其左
右

萬卷堂

天下名勝志無爲州羣山觀今爲崇德觀在州治東觀西
有萬卷堂宋祥符中道士李景僊藏書兩監多秘閣所無
者後以一監進於朝

采楊傑詩偃月仙翁化雨初玉京搖下紫雲車旌旆杳
入三清路樓閣空遺萬卷書

南樓

按方輿勝覽南樓引楊次公詩云此樓此景他州無山川
形勢吞三吳一統志作九華樓詩見後

九華樓

〔方輿勝覽〕九華樓在移風門上米元章建江南九華諸山
屹然相向

宋楊傑九華樓詩此樓此景他州無山川形勢吞三吳
唯憑詩老寫奇勝縱有畫筆難工夫

又此樓此景他州無天高水闊連平蕪綠楊深處杏花
發日暖數聲山鷓鴣
又此樓此景他州無關千倚遍還躊躇主人有酒且共
醉羅歌不用催行車

明遠樓

〔方輿勝覽〕明遠樓在楚澤門郡守米元章所建下臨百萬
湖

康熙志米元章題額

蔡梅詩水白峯青瑟瑟秋斷雲孤鶴恣閒遊生平攬勝憑雙屐竟日耽吟倚翠樓古木飽餐霜露冷大江不盡古今流寥天極目飛鴉外幾點煙縹起暮愁

聚山閣

方輿勝覽聚山閣在郡圃北羣山橫列惟二山爲勝銀嶽之深秀則喬松所居寶峰之壯嶮則吳魏之所守也

江南通志在無爲州治宋米芾建

按康熙志引阮美成記略與方輿勝覽同

西園

方輿勝覽西園亭館爲一郡之勝概

聖池

方輿勝覽墨池在郡縣米元章所鑿

江南通志在無爲州治宋米芾所鑿蛙聲聒人取片瓦濡墨書之投諸池蛙鳴遂絕又大書墨池二字石刻今尙存

明趙範重修墨池記略郡治故有墨池公解後西北偏十數弓許乃宋熙豐知軍米公芾遺跡也公性好奇嗜嗜書政尙簡易每暇輒臨池上以揮灑自適謂漢揚子雲草太元常名所臨之池曰墨池乃手書墨池二大字紀其勝比南渡後此地燼於兵燹公所臨寶晉諸帖悉漫漶亡存獨墨池二字勒諸石亦頽缺嘉靖癸丑萬安朱君麟得之積垣下因完其缺樹公解後繼而進賢雷君夢麟移置池上池之北爲剏寶晉齋之前增剏一盤亭仍顏其坊額馬絛以垣軒楹徹豁林木虧蔽池之景於是復出矣願歲久池隄之敗且半勢秋隘不可以瀦嚮所樹公手碑亦圯斜若將傾狀隆慶壬申余來守此郡因謀於僚友賓賜朱君少華唐君相與鳩工聚材重構而稍闕之池之隄更整以石池之中爲亭曰水心亭後駕小橋以濟其前又負土壘石爲小山植公碑而砌焉方雨澤稍集池水溶漾與亭相掩映天光雲影上下一碧當瞻眺之頃遠近孤峰列障四望皆隱

隱然若起若伏若趨若拱若沈若浮可盡得之於亭之中於池之上殆奇觀也志稱公知是軍時值歲有蝗災乃掠境而過禾稼無所傷其澤之在人今猶誦之又稱公常草書池上厭蛙聲不輟引硯投之蛙遂禁聲不復鳴此其事若涉神異而公之感人動物爲可想見矣然則茲池也因遺跡之一而其流風餘韻與公俱存者獨茲池也哉朱君名體仁永嘉人庶君名虞烏程人俱捐俸繕事而長汀程果則樂觀厥成在平蔣子繼先亦有方焉時萬曆三年歲甲戌冬十二月

四望臺

天下名勝志引方輿勝覽州治內四望臺英宗時知軍滿

雜端建

宋滿雜端四望臺詩疊石層高暗綠苔茂林深處獨崔嵬花陰竹影重重見山色川光面面來通夜欄杆隨月尚納涼窗戶趁風開踏踏觸目堪嗟賞倍費登高詠賦才

稻孫樓

天下名勝志稻孫樓在大安門上米元章秋日登樓燕集
見田禾復青問諸老農曰稻孫也稻已穫得雨復抽餘穗
故青青如此公喜因以稻孫名樓

挹秀亭

州志在錦繡溪中疑卽沂春亭

釋志亭

宋鍾文珍釋志亭記文武非二致也執斧斯者卽制作
禮樂之手御萊夷者卽從容杏壇之答問古人成童舞
象已有事於武軍旅未學豈真未之學哉後世岐而二
之操三寸管者弗知縮略臂二石弓者弗暇詩書談者
且曰光嶽氣分天下無全才胡不觀射法亦曰人皆有
力二石之外非常力也鄉射不講而談之無全才寧不
厚誣國朝自淳熙中習射之令內而成均外而黷泮園
不祇承潘須舊有射圃有士甲中閒寢廢比歲以邊防
益密復締義甲爲鄉井計而士操戈挾刃非宜攷藝觀
德惟射有取願略而不講非缺典歟使君潼川吳先生

建牙之初禮士如渴崇重風化一日語冷掾鍾文珍曰
立義甲而不別士甲非所以重衣冠也爰命與寓公高
郵司理張君應新糾倡三邑之士五爲伍十爲甲列籍
題名近六百人闢學宮東偏下平如砥練以垣牆上爽
而豈蔽以亭宇俾及時閑暇從容游習亭東向掛弓扶
桑挹天下之仁氣也的西向飛巖刻剡因天地之義氣
也袂屬肩摩容止可觀揖升下飲進退有度庶幾相圖
氣象由是月必一會酌有醴旌有儀觀聽作興道器俱
融德藝並進他日貢諸天子之庭而天子慶之建勳業
於宇宙間文武挺特不朽必今日士甲中人也記曰射
之爲言釋也釋者各釋己之志也使君身涵蓄莪之澤
私淑章縫之教扁其亭曰釋志厥旨淵矣繼自今預是
甲者各釋桑蓬初志毋失正鵠釋云釋云弓矢云乎哉

五雲閣

康熙志在州城闌闔中五雲叟陳勿建勿號文靖先生

假月池

康熙志在州治南每中秋夜月假半輪今泮

三桂堂

〔康熙志〕宋王之道兄之義弟之淵俱中甲科故名

漕臺

〔明崇禎志〕稽古閣云軍學在漕臺東宋時設漕運司以轉江襄漕事

平山堂

〔州志〕在儒學前紫芝山上宋時建

林泉書院

〔明崇禎志〕在相山宋太師王之道讀書處

講書樓

〔州志〕在城隍廟前宋謝枋得寓此州人作樓居之

熙春園

〔州志〕在州治東五雲閣

華林園

〔州志〕在倉埠門接華林河二園宋王氏植花之所

度春園

〔州志〕在南門外一字城宋劉氏植花之所

巢縣第宅

洗耳池

明崇禎志在治東一里卽飲牛池昔堯召許繇爲九州長不欲聞乃洗耳於此巢父牽犢欲飲問其故曰汗吾犢口牽牛上流而飲之

江南通志在教場西

明孫朗洗耳池詩我愛枕流臥泠泠鏡碧奇此中有真得應識許由心

孔子臺

天下名勝志彙舉有孔子臺臺狀圓壇可容千人近臺有

聽書港

詳見會吳城

明葛遇朝聽書港詩山城百里水千瀦洙泗源流匯一梁沅芷湘蘭公子根金和玉節聖人居當年鄂曲誇高唱異日緇帷笑老漁澄碧更看長夜月望洋莫漫測方諸

回車巷

明崇禎志在治西北十五里相傳孔子至此回車

浮邱釣石

康熙志在巢縣濡須口爲浮邱公釣處水濱一大石如棋

枰上鐫四字三面巉巖環繞若假山然

明辛承祚浮邱釣臺記予家浮邱釣臺畔憑弔俛仰殆終吾生以徜徉也臺踞中流怪石巖波峭者如壁躡者如虎近水一石方廣平坦可跌坐疑卽垂竿處也舊鐫有浮邱釣石四字跋曰蘇翁題未攷蘇翁何人鐫名何年歲久字階滅幾半余鐫之使深其中似有詩句或激湍盪去未可知也臺前賈舶漁舟往來不絕臺後烟村古木環遶可觀七竇數峰拊其背亞父旗鼓諸山當其面左右平時如縵委折而下有龜山寺潮流而上有慈雲閣皆與此臺映帶焉公之流連於此宜也予曾以公故實詢之客鮮有應者嘗讀綱目注云周靈王時有近侍授秩浮邱伯與王子喬友善後導喬入嵩山學道不知所終又古有云浮邱公不使相鶴九方臬不使相馬安得有衡霄之姿與絕塵之足以此觀之子喬浮邱相與把臂烟水雲山中皆飄飄乎仙侶也然則相鶴之浮邱公卽授秩之浮邱伯無疑矣予自明末乙酉歲拂袖歸里時登此臺其巖濕足俯鏡願種種竊懷此空洞一石清澗一帶水也浮邱公有鬚笑我哉偶乘月扣舷而歌得古詩一章

亞父故居

天下名勝志縣治范亞父故居

江南通志在巢縣東北二十里亞父山

按寰宇記云巢縣東十里有亞父山御范增所居則在縣治非也

亞父井

史記項羽本紀正義皇覽曰居鴻廷中有亞父井吏民皆祭亞父於居巢廷上長吏初視事皆祭然後從政更造祠於郭東至今祠之

太平寰宇記按古今葬地記云亞父家在巢縣郭東有亭亭中有井謂之亞父井

明崇禎志井在縣廳後

按此則亞父井有二一在縣署一在郭東

明汪文兆亞父遺井詩咸陽秦帝初失鹿紛紛豪傑爭
馳逐卿子冠軍雷不行帳前流血萬人驚范增當日爲
謀主趙魏燕齊不足數鴻門獨意在沛公此日天與何
不取老臣骸骨歸山阿漢人城幾無幾何悲涼往事如
流電人世幾回朝野變范家故址築王城春去秋來百
草生山前古井今猶在蕭索空傳亞父名

八公昇天處

康熙志在巢縣見山川一統志云八公山上有淮南王廟
今屬巢縣列仙傳云淮南王好神仙秘法鴻寶之道忽有
八公鬚眉皓白詣門請見關人曰吾王好長生先生無駐
衰術未敢聞八公成變成童後白日上昇遺藥在器雞犬
舐之皆得仙去

錢里

江南通志錢里在巢縣西北濱焦湖吳太平二年孫琳拒諸葛誕於壽春大發兵出屯錢里帝亮責琳留湖中不上屯一步者是也

姚萇村

康熙志在巢縣青龍湯山橫山之閒四山回合中爲原曰晉永和八年姚襄來降九年屯歷陽故萇駐師於此

劉知幾書院

康熙志見山川縣學其故居也

抱書橋

天下名勝志宋縣人呂士元學問該博元祐丙寅立十科舉士法士元上書懇切後累試不第憤曰當今蔡確章惇

爲政吾輩老困田園於世無補至東山橋抱所著書自溺

揚于芳重修抱書橋碑記橋名抱書以宋呂士元名之也士元負經濟才讀古人書見聖賢心慨然以天下爲已任當紹聖之年蔡確蔡卞呂惠卿章惇用事忠義激烈走都門詣劄上書痛陳時弊諸奸抑之不得進悲忠諫之弗達恨懷抱之不伸歸而憤曰當今四害不除民患日深吾生亂世空濟時艱且讀書將以行道救民而今坐視陸危余不忍此態安用生爲又昨所上書皆當世急務而全軀保妻子者且非而笑之已矣吾將與之俱盡因抱其所上書與所讀書至橋上自投於河以死後人思之因名其橋曰抱書云橋去邑不三里當東南孔道向有側募石於治廢六十年矣康熙六年倡募重建落成復於其旁爲庵爲亭行旅往來咸甚便之夫上元不忍見生民之困厄至憤嫉自沈此與屈子行吟汨羅賈生痛哭至長沙不食以死其心一也屈賈言行見於當世後之人傳而悲之呂生之言行未著而獨識之於一橋衆人知之天下未盡知之然過者稱名攷實猶可想見其遺風餘烈橋千古士元千古矣爰勒石而係之銘曰人之於書具文視呂生於書性命以書名橋書不沒書不沒兮生不死天空雲淨月在水光燦晃豈誰龍比巢山高鳳難繼美千古常存有呂子各於心地

無纖滓以身殉道蹈仁止顛隕莫救不忍視豈獨魯迪
天下上

冢墓

廬郡冢墓寥寥無古書可據如桀王墳虞姬墓之屬不爲興安何晏墓亦以唐時得甄定之蓋戰爭之地碑碣傾毀墟隳不可復識路史國名記載臯陶冢在舒城東南六十里陂中證之水經註泚水逕六安縣故城西縣都陂中有大冢卽臯陶冢似以在今六安州爲是故未著錄其皇覽所稱居巢郭東亞父冢魏收又以爲在彭城不如從最古之說矣舊志列冢墓於古迹則

國朝名臣諸墓何以附後今別爲一門附於古迹之後云
府治合肥

漢樊噲墓

明崇禎志在城西千字山

古仙女冢

輿地紀勝仙女冢在梁縣教場內

梁梁女墓

輿地紀勝梁女墓在梁縣之浮槎山梁天監三年公主祝髮爲尼寺有海榴世傳乃女所植也今有梁女墓在殿東五代吳王楊行密墓

輿地紀勝鐵索澗在合肥縣管見澗側有古墳石板上龍鳳相傳以爲楊行密墓又引九域志有楊行密墓

宋馬忠肅公亮墓

明崇禎志在縣西七里宋學士晏殊有銘今廢御史楊瞻

立石表之

宋包侍郎令儀墓

明崇禎志在縣東七里

宋包孝肅公拯墓

明崇禎志在縣東十五里自子縉以下皆附葬

宗廟孝肅包公墓記至爲淮西從事之三月始得再
拜謁孝肅包公墓下嗚呼慶歷嘉祐之間何其盛也仁
宗皇帝以天地高厚之德平治天下而又延登耆雅容
納忠讜維持孝肅公危言直論排斥權倖切劘治道而
扶持國本者觀奏疏可考焉至其臨政明不可欺剛不
可撓公不可干以私今百餘年所更兵火子孫流離故
宅廢爲民居獨廟祀存焉去城十五里所謂東村原
者公之墓也去皇考侍郎公墓七里每春秋授縣令
紳諸生往修歲祀然而邱封荒頽幸木萌拔揆夫牧賢
往來其禁甚者至蹊其墓田欲奪而有之嗚呼以忠賢
端士而報施乃爾豈天道耶或兵革之後未能遽復耶

教授丁君端祖縣令潘君友文相與鳩工斂材次第修
治會部使者王公帑助其役費線以周垣方一百五十五
然不諗月斥公帑助其役費線以周垣方一百五十五
步蒿剔棘蓬植藝松檜祭饗有堂基道有門碣墓記藏
雖不復存立表署阡往來其下者皆知爲孝肅公之墓
瞿然知敬風動一鄉而又正其墓禁直其田之訟歸之
包氏使歲時奉烝嘗所以竭虔妥靈者厚矣嗚呼仁人
君子固有不幸而不能保其後者也世人不察誘以天
道報施之不常以起爲善者之懼而不知君子之澤雖
曰五世而斬至於流風餘韻聞者爲之興起孰使之然
哉扶持風化調護其子孫此正吾人責也可舍此謂天
道是耶公之元孫邦直朝廷蓋嘗命之官今雖老不能
仕而州縣之閒經紀其存歿者可獨爲包氏計耶風化
所係多矣至於連帥之命告成於公墓而且屬筆以記
其事公之助德載在國史訛不復論姑序其本末以爲
後來勸

宋翰林學士劉筠墓

明崇禎志在縣水西門外

宋危侍郎墓
危侍郎墓
危侍郎墓

明崇禎志紀間嘉靖中庠士張善工人鑿塘忽得墟墓乃危侍郎者有包孝肅撰碣善亟掩之在城東北四里許又有掘塘得蔣侍郎墓者其棺甚長棺前空三尺許排列冥器在內鄉民訟於官官治以罪而掩之二侍郎名代無考元葛編修間孫墓

明崇禎志在縣南六十里余忠宣公表之
古烈女墓

明崇禎志在縣西門外一里許未詳何代人封識宛然
明追封黔國威毅公吳復墓

明崇禎志在縣北鄉洪武中勅葬威毅公吳復學士劉三

吾銘

明追封漳國公鄭用墓

康熙志在縣東鄉永樂中諭葬武安侯鄭亨之父大學士楊榮銘

明追封鄭國公宋某墓

明崇禎志在撮城鎮宣德中勅葬西寧侯宋晟之父大學士邱濬銘

明追贈平江侯陳閔墓

明崇禎志在大蜀山前永樂中勅葬平江伯陳瑄之父大學士楊士奇銘

明追封蔡國公張忠毅公墓

明崇禎志洪武中勅葬衍聖公孔希學銘

明都督同知郭公墓

〔明崇禎志〕在店埠鎮東二里許大學士楊士奇銘

明都督僉事瞿通墓

〔明崇禎志〕在土山洪武中勅葬有銘永樂中仆其碑

明王指揮瑛墓

〔明崇禎志〕在店埠鎮東洪武中勅葬

明進贈禮部尙書蔚可立墓

〔明崇禎志〕在威武門外正統中勅葬尙書蔚公綬之父

明禮部尙書蔚綬墓

〔明崇禎志〕在時雍門外

明贈右副都御史張敬墓

明崇禎志在城南童安塘側

明都御史張淳墓

明崇禎志在南門外楊公廉銘

明知府孫鎮墓

明崇禎志在縣西南三里

明周忠愍公璽墓

明崇禎志在城西門外三里井

明尙寶卿蔡悉墓

明崇禎志在城東八里岡

明布政寶子傅墓

明崇禎志在城西千字山

明贈光祿寺卿程楷墓

康熙志在西門外方家岡

國朝贈兵部尚書龔孚肅墓

縣志在城南桃花鎮禮部尚書鼎孳之父

禮部尚書龔鼎孳墓

康熙志在巢湖菴後

通政司左叅議王綱墓

康熙志在城西駱家廟前

大學士謚文定李天稷墓

縣志在白衣菴東南賜祭葬

陝西督學許孫荅墓

縣志在梅子山

舒城

漢羹頡侯墓

輿地紀勝漢羹頡侯墓在舒城縣西北三十五里俗呼爲舒王家

明崇禎志在縣北四十里嘉靖閒知府何稱立石宋李公麟墓

輿地紀勝李公麟墓在舒城縣南五里

明吏部左侍郎鄭泰墓

明崇禎志在縣東三里

明刑部尚書鄭時墓

明崇禎志在縣東三里

明戶部尚書莊簡公秦民悅墓

明崇禎志在縣西三里

明伊府左長史祝富墓

康熙志在城西南十五里打石山後

明贈詹事府少詹胡守恆墓

康熙志在縣南二十五里

明御史任天成墓

康熙志在縣南三十里椒子冲

明胡靜山墓

縣志孝子理學墓在大東門外三里

明贈刑部侍郎鄭伯仁墓

縣志在東門外三里

明贈刑部尙書鄭觀墓

縣志在東門外三里

明貢士祝挺生墓

縣志在縣南三十里春秋山前

明姚之龍墓

縣志孝子墓在縣南四十里童家沖

明郭近川墓

縣志貢士石泉博學墓在縣南四十里童家沖

明同知許榮墓

縣志墓在城南五十里灣塘

明郭鳳亭墓

縣志孝子理學墓在縣北四十里八里岡大梅塘

明贈兵部尚書秦鳳墓

縣志墓在縣西六十里友鹿沖

明贈兵部尚書秦綬墓

縣志墓在縣西六十里友鹿沖

明御史姚壽墓

縣志墓在縣左六安門外

明國子監丞祝淵墓

縣志墓在縣左六安門外

明錢敏墓

〔縣志〕孝子墓在縣北一里

明胡仕祥墓

〔縣志〕孝子墓在縣北三十里史家岡

明翰林詹事胡守恆墓

〔縣志〕墓在縣北三十里史家岡

明都總統郭子民墓

〔縣志〕墓在縣北三十五里舒王墩前

明祝汝忠墓

〔縣志〕理學墓在縣西南打石山前

明孝廉郭梅菴墓

縣志墓在縣西北八里岡梅塘

明史節婦墓

縣志胡福妻墓在縣北三十里桃城史家岡

廬江

楚宛春墓

天下名勝志引城冢記云廬江縣東北宛春冢左傳楚子玉使宛春告于晉晉先軫拘之于衛以怒楚者死葬于此見僖二十八年

漢廬江王墓

太平寰宇記廬江王墳在縣東三十里梅山側有風雨晦冥卽聞音韻如金石

輿地紀勝引九域志有漢廬江王演墓

吳周瑜墓

明崇禎志在縣東門外二里許

明彭教周瑜墓詩一代英雄土一杯寒雲衰草翳荒邱
煙消赤壁人何在月滿長江水自流已見有功成鼎足
誰云無策定神州功名未就身先死落日青山萬古愁

晉何晏墓

太平寰宇記何晏墳在廬江縣北七十里其墓高大景雲

二年有人發墳得甌銘知爲何公之墓

南唐狀元伍喬墓

明崇禎志在馬厰岡居民耕出碑驗其父母墓在柴埠渡

南岡

孫宏詰南唐儒者伍喬墓考隋唐以前民間得以其諸
牒上於官官掌之法甚嚴也於是或遠遷而別始或其諸
系而更姓某遷自某某系自某歷傳可稽及其後譜局
廢矣況以五代用兵流徙喪亂之時乎又況於前賢之
墓數百十年埋沒於荒榛積楚夫孰有問其所繇來者
乎余自領廬江治事之暇按故志訊諸父老所傳知有
吳周瑜墓爲賦小詩已而知有南唐儒者伍喬墓喬之
卒或曰署宣州幕府考滿遷考功郎卒於官或曰黃巢
亂與同鄉里張喬棲老九華或又曰江南國除歸隱九
華以終夫喬貴池人生唐懿宗末年少卽工詩聞杜牧
赴闕賦一詩迨南唐張洎爲翰林學士又賦寄之計是
時喬通判歙州當已年七十矣自韓熙載主文以入
卦賦齋後望鍾山詩試喬呈卷稍後主司飲中選者升
堂坐先宋貞觀繼以張洎先之又繼以喬先之楊出果
喬第一泊第二貞觀第三與其坐之次無一差元宗命
石勒喬賦於國門以爲程蓋喬當貧時學於廬山嘗一
夕見人掌有讀易二字自隔隙入乃取易讀之探其微
山之僧素不識喬也夢人指大星曰此伍喬星達旦訪
得喬因資之勉爲進取乃喬亦竟以此而行及博一第
其遲晚矣今伍氏居廬江者是其後則廬江之有喬墓
豈無忘乎其爲貴池也大明一統志廬池人物竝載不
分別其生卒馬令南唐書列喬儒者傳而但謂之廬江

風俗考卷之五
三
不明其所自始猶之南畿志周瑜墓既載入廬江又載入安慶則所稱喬卒於官與隱於九華惡知其子孫託籍之後不遷喬葬於廬江而於墓相守也余故勅工鐫石以表焉其地今名馬廐岡

明解元墓

〔明崇禎志〕一在學基東南隅景泰庚午修築土中得殘碑刻曰公一解元之墓而無姓名一在安豐鄉基制甚偉故老稱解元姓李而忘其名

明侍郎陳植墓

〔明崇禎志〕在白石山永樂元年勅命遣官護葬

明贈監察御史盧墩墓

〔明崇禎志〕在蔡山東北麓詹事王瑛撰表

明四川布政司叅議錢朝鳳墓

明崇禎志在縣西北七十里湖塘嘴

明贈戶部廣東司員外郎宛鏜墓

明崇禎志在縣東二十里蜃山之麓

明贈直隸廣平府知府柳琪墓

明崇禎志在縣南七十里金頂山麓

明戶部郎中王恆墓

明崇禎志在治北五里作坊河

明湖廣右叅政柳希玘墓

明崇禎志在治南七十里

明太常少卿朱來遠墓

明崇禎志在治南十里沙湖山麓

明大理寺副王敬墓

康熙志在治東北五里作坊河北

明戶科給事中胡淵墓

康熙志在小西門西岡外

國朝贈廣西都督劉承恩墓

在縣南五里胡畢塘康熙十八年勅葬

國初贈都督王承業墓

在縣北七十里白石山康熙□年勅葬

無爲州

鐵墳

州志在南鄉銅坑

樊將軍墓

明崇禎志在北鄉樊家圩

州志在南鄉樊家圩

應先鋒墓

州志在城西南二里一作應丞相

潘明王墓

州志在西鄉竹子山

袁昭義王墓

州志在城北十五里地名袁家堡

宋胡通判墓

明崇禎志名未詳在襄安鄉去城南四十五里

宋侍郎賈易墓

明崇禎志在無爲鄉去城北三里賈家灣道傍有表

金明源重修賈公墓道記節略宋工部侍郎賈公名易字明叔諡文肅師程伊川稱入室弟子成進士歷官中外節槩凜然具載宋史墓在州北郭年代久遠幾莫知爲賈公墓也乙未秋吏日沈君以公事出見荆棘中有殘缺古碑其完好處字畫井然上鐫賈公遺像名人詠跋係公九世孫孝恭於元至正年所勒距今四百餘載矣亟謀整理州紳盧君聲問慨然身任鳩工輦石重建崇坊姓氏官爵朗若列星地當孔道過客停車皆肅然知爲賈公墓也向者邱壑旣夷致多停樵稽諸功令保護云何今已特立墓門有目共覩雖旣往之不咎勿安土而重遷若復梗頑則當依律治罪因綜其整理之顛末鐫諸片石豎於墓所

明關世隆賈公墓詩凄風生野暹天色欲黃昏下馬侍郎墓看碑賈氏村蘇紋迷斷碣霜笏倚殘痕舊事能傳說知公幾葉孫

宋僕射陸母必墓

明崇禎志在開城鄉

宋御史秦中墓

明崇禎志在北鄉雙泉山

宋郎中雙漸墓

明崇禎志在無爲鄉城西三里

宋狀元焦蹈墓

明崇禎志在西門外三里

天下名勝志宋狀元焦蹈墳在州西三十里蹈州人通經
史百家嘗國首鄉舉元豐八年禮部貢院火改期別試蹈
爲大魁京師諺曰不因南省火怎得狀元焦

宋居士章迪墓

明崇禎志在西門外花家疇有表

宋米芾章吉老墓表神農有熊氏咸以球民爲道上聖
神靈生而知之簡易無文後世聖賢相師或口授若心
得其至也雖千年若合符契故孔氏謂安知來者之不
如今又曰聖人有道字不能知夫陰陽諸精而得針刺之術
不妙哉無爲章氏迺字吉老洞精醫書而得針刺之術
於素問內經之閒以其道採人壽至七十其道授子濟濟
透膽隨針病已華佗氏不能過也又以其道授子濟濟
警抹三千人因不復針又以父道付子權吾聞士大夫
多道濟權起病如神速得守符親所嘗試會濟請以吾
友周元章撰埋志不復多願表墓道遂直書其事以吾
不及識君觀其子孫廉介自守不以藝取人知君隱施
夫行符藥除病抹人除害物者上滿有錄許氏旌陽雞
犬亦仙去後之人勿替其志來於墓下讀吾文者勉之
大觀元年歲在丁亥西午湖丙戌日男濟立石
明車萬育同王秋潭西郊訪章吉老墓碑詩竝馬西郊
外郊寒十月初來尋章迪墓得識米頰書襄柳迷江岸
高松覆草廬茗談山色晚還照樹扶疏

宋魏國王之道墓

明崇禎志在開城鄉南去城西北五十里

宋侍郎王蘭墓

明崇禎志與王公之道墓近

宋方孝子墓

明崇禎志名未詳在花林窰去城北二里

元丞相齊克讓墓

康熙志在北門外草市

元禮部尙書袁壽欽墓

州志在北門外演武亭之北遺命子孫墓碑但書姓名勿

具官爵

元武毅將軍沙都刺墓

州志在城南風雨壇西

明尚書薛遠墓

明崇禎志在西門外五里有表有像有記饗堂儀從石刻
尚存

明知州夏君祥墓

明崇禎志在西門外花家疇有表

康熙志隆慶五年州守洪邦光表之

明尚書薛祥墓

康熙志在城外五里饗堂翁仲在旁其祖墓在北鄉下箔山

明狀元邢寬墓

明崇禎志在花家疇去城西三里

明薛尚書祖墓

明崇禎志在北鄉三圖下箔山有裔孫薛仲仁歲祀

明通政使湯鼎墓

州志在城南五里姜師橋

明右叅政朱昂墓

州志在南城外十里

明左叅政李春墓

州志在南城外七里

明布政使仰昇墓

州志在城西三里花家疇

明武毅將軍沈均保墓

州志在南城外七里

明參議吳廷翰墓

州志在南城外五里教子灣子主事國寶墓附

明史部主事謝封墓

州志在南城外一里曹家山

明工部主事沈桂墓

州志在西城外三里花家疇

明都御史劉崙墓

州志在南城外二十里地名平頭松

明兵備副使盧泮墓

州志在南城外姜師橋地名馬家莊

明金華太守劉汝佳墓

〔州志〕在城南三十里地名苧蔴嘴

明大理寺卿錢策墓

〔州志〕在西北城外二里花家壩

明贈太常卿吳萼墓

〔州志〕在城北十五里地名鐵羅岡

明贈太常卿吳廷弼墓

〔州志〕在南鄉葛公山去城一百里崇禎五年賜祭葬

明兵部侍郎吳光義墓

〔康熙志〕在南鄉葛公山去城九十里

明通政使朱萬春墓

〔州志〕在南鄉查林嘴移葬巢縣城西

明推官張克佳墓

〔康熙志〕在城北八里南汰寺後

明郎中朱芾煌墓

〔康熙志〕在城南四十里襄安鎮

國朝建寧太守吳開允墓

〔州志〕舊在北城外後移葬巢縣俞府舊址

都閩阮應時墓

〔州志〕在南鄉前河旗鼓墩

副總阮自雄墓

〔州志〕在南城外二里地名野猫巷

文登令吳閻啟墓

州志在南鄉柳尖山地交廬江界

封郡丞吳吳墓

州志在城北三十里地名玉林岡

司李朱前詔墓

州志在城北八里南汰寺側

治中朱前詒墓

州志在北城外二里地名螺浮墩

臨湘令吳漢墓

州志在城南七里地名杏花村

中書舍人吳世墓

州志在城南七里杏花村

長沙令謝舉安墓

州志在城南三十五里地名墩子山

巢縣

桀王墳

康熙志在放王岡

按縣志在縣東三里地離桀王城古蹟東行二里有岡其長可三里許乃放王岡也上有大墩五六其近北者特立岡頂土人傳呼曰王墳南數墩曰疑塚也

漢范增墓

明崇禎志在縣後

漢書居巢注引皇覽曰范增冢在郭東

太平寰宇記范增冢在巢縣按古今葬地記云西楚項羽以增爲亞父羽不用其謀遂疽發背而死葬於此冢在巢縣郭東有亭亭中有井

按地形志彭城郡彭城有亞父冢然皇覽魏時人書在魏收之前不可誣也

明徐渭題亞父墓詩王者從來云不死其疑隆準及重瞳已占龍氣成天子却幸鴻門敗乃公一牧乳羊漣草白幾株寒棗覆碑紅憐儂疽發不欲活豈爲人開少鄧

通明陳子詩七十衰翁兩鬢霜西來一笑火咸陽平生奇計無他事只勸鴻門殺漢王

虞姬墳

縣志相傳西楚霸王于嶺上聞楚歌聲遂散兵虞姬因自

勿葬於此

按史記漢困楚於垓下其地在鍾離與此相去甚遠

明光祿卿曹琥墓

明崇禎志在河南牛角山下離城二十里

明通政朱萬春墓

康熙志在城西□□里先葬無爲州南鄉遷今處